

Upravni odbor BHRT-a je donio izmjene i dopune Statuta BHRT-a 28.04.2011. koji je dostavljen poslovodstvu BHRT-a 18.05.2011.

Napomena : S obzirom da poslovodne i uređivačke strukture nisu konsultovane o sadržaju izmjena i dopuna Statuta, o tome će naknadno iznijeti svoje stajalište i prijedloge.

Na temelju članka 29. Zakona o Javnom radiotelevizijskom servisu Bosne i Hercegovine, (Sl. glasnik BiH br. 92/05), kao i člana 41. stava 1. alineje 1) Statuta Radio televizija Bosne i Hercegovine (BHRT), Upravni odbor Radiotelevizije Bosne i Hercegovine, na 71. sjednici održanoj u Sarajevu dana 26.04.2011. usvojio je

**IZMJENE I DOPUNE**  
**STATUTA**  
**RADIOTELEVIZIJE BOSNE I HERCEGOVINE**

**Članak 1.**

*U članku 1. iza stava 1. dodaje se novi stav 2. koji glasi:*

**Javni radiotelevizijski servis Bosne i Hercegovine (Javni RTV servis BiH) uređen (registracija, djelatnost i organizacija) je na osnovu Zakona o javnom radiotelevizijskom servisu Bosne i Hercegovine („Službeni glasnik BiH“, broj: 92/05 od 28.12.2005. godine).**

*Dosadašnji stavovi 2. i 3. postaju stavovi 3. i 4.*

**Članak 2.**

*U članku 6. stav 1. iza riječi „Televizija bez granica“ stavlja se zarez iza kojeg se dodaju riječi: „kao i međunarodnog prava obavezujućeg za sve članice EBU-UER.“*

*U članku 6. Iza stava 1. dodaje se novi stav 2., koji glasi:*

**„Radiotelevizija Bosne i Hercegovine osigurava korištenje prava i izvršava obaveze koje proizilaze iz članstva u Europskoj uniji za radiodifuziju (EBU-UER) – (The European Broadcasting Union – EBU, L’Union Européenne de Radio-Télévision - L’UER, [www.ebu.ch](http://www.ebu.ch)), iz Konvencije o prekograničnoj televiziji kao i međunarodnog prava obavezno primjenjivog za sve članice EBU-UER.“**

*Dosadašnji stav 2. članka 6. postaje novi stav 3. i mijenja se na način da se iza riječi „Korporacija javnih RTV servisa BiH“ stavlja zarez iza kojeg se dodaju riječi: **„nakon njenog osnivanja.“***

*U članku 6. iza prve rečenice novog stava 3. dodaje se druga rečenica novog stava 3. koja glasi: **„BHRT zastupa RTV sistem Bosne i Hercegovine u međunarodnim organizacijama i asocijacijama do osnivanja Korporacije.“***

### Članak 3.

U članku 11. stav 1. iza riječi „konstitutivnih naroda BiH i ostalih“ stavlja se zarez iza kojeg se dodaju riječi: **„kao i prava nacionalnih manjina.“**

### Članak 4.

U članku 17. stav 3., nakon riječi „Televizija bez granica“ stavlja se zarez iza kojeg se dodaju riječi: **„kao i međunarodnog prava obavezujućeg za sve članice EBU-UER.“**

U članku 17. stav 4., nakon riječi „on“ dodaje se riječ „unaprijed“, a nakon riječi „ovlasti“ dodaju se riječi: **„da ga u cjelosti zastupa u njegovim pravima i obavezama glavnog ravnatelja.“**

U članku 17. stav 4. nakon prve rečenice stava 4. dodaje se druga rečenica stava 4. koja glasi: **„O ovom ovlaštenju glavni ravnatelj obavještava Upravni odbor odmah nakon stupanja dužnost.“**

### Članak 5.

U članku 19. stav 1., nakon riječi „ravnatelj“ dodaje se rečenica: **„Glavni ravnatelj o ovim punomoćjima odmah obavještava Upravni odbor.“**

### Članak 6.

U članku 22. mijenja se stav 2. te isti glasi: **„Nakon što bude osnovana Korporacija, BHRT će u Korporaciju prenijeti one djelatnosti koje su definirane za Korporaciju u skladu sa Zakonom o javnom RTV sistemu BiH.“**

### Članak 7.

U članku 26. stav 4. alineja 1. briše se riječ „upravljanje“ i zamjenjuje riječju **„rukovođenje“**.

### Članak 8.

U članku 28. dodaju se novi stavovi 2. i 3. koji glase:

**„U roku od 30 dana nakon usvajanja izmjena Statuta, Poslovodstvo će izvršiti usklađivanje Pravilnika o unutarljivoj organizaciji BHRT i dostaviti ga na davanje saglasnosti Upravnom odboru na njegovoj narednoj sjednici.**

**U roku od 15 dana nakon usvajanja izmjena Statuta, glavni ravnatelj donijet će Pravilnik o radu Ravnateljstva/Direkcije generalnog direktora BHRT i dostaviti ga na davanje saglasnosti Upravnom odboru na njegovoj narednoj sjednici.“**

### Članak 9.

U članku 35. dodaje se novi stav 3. koji glasi:

**„Poslovodstvo BHRT će izvršiti usklađivanje Poslovnika o radu Poslovnog odbora**

**BHRT u skladu sa svakom usvojenom izmjenom Statuta BHRT u roku od 15 dana nakon usvajanja izmjena Statuta BHRT od Upravnog odbora, i dostaviti tekst usklađenog Poslovnika o radu Poslovnog odbora BHRT na davanje saglasnosti Upravnom odboru na njegovoj narednoj sjednici.“**

#### **Članak 10.**

*U članku 36. dodaje se novi stav 2. koji glasi:*

**„Rukovoditelji organizacijskih cjelina u roku od 15 dana nakon izmjene Statuta dostavljaju Upravnom odboru na davanje saglasnosti sa Statutom usklađenu Odluku rukovoditelja organizacijskih cjelina na njegovoj narednoj sjednici. Odluka rukovoditelja organizacijskih cjelina treba u istom roku od 15 dana da bude usklađena i sa Poslovníkom o radu kolegija koji se dostavlja na saglasnost Upravnom odboru BHRT na njegovoj narednoj sjednici.“**

#### **Članak 11.**

*U Članku 37. u drugoj rečenici stava 3. briše se riječ „On“ i zamjenjuje riječima „Upravni odbor“ a iza riječi „poslovanje“ dodaju se nove riječi: „BHRT, kontrolira rad Poslovnog odbora“.*

#### **Članak 12.**

*U Članku 41. u alineji 12) nakon riječi „daje“ dodaje se riječ „prethodnu“, a nakon riječi „programa“ dodaju se nove riječi: „na prijedloge Glavnog ravnatelja.“*

*U Članku 41. u alineji 24) nakon riječi „radu“ dodaju se nove riječi: „i usvaja njegove izmjene“, a nakon alineje 24) dodaju se tri nove alineje:*

**„- daje suglasnost na donošenje izmjena Poslovnika o radu Poslovnog odbora BHRT i Poslovnika o**

**radu kolegija;**

**- daje saglasnost na Pravilnik o radu Ravnateljstva/Direkcije generalnog direktora BHRT;**

**- daje suglasnost na donošenje izmjena svih opštih akata iz člana 72. ovog Statuta;“**

*U Članku 41. dosadašnja alineja 25) postaje alineja 28).*

#### **Članak 13.**

*U Članku 42. nakon stava 2. dodaje se novi stav 3. koji glasi:*

**„Za usvajanje statua kao i za usvajanje njegovih izmjena i dopuna potrebno je da glasuju najmanje tri člana Upravnog odbora.“**

*U Članku 42. dosadašnji stavovi 3., 4. i 5. postaju stavovi 4., 5. i 6.*

#### **Članak 14.**

*U Članku 44. nakon riječi „radu“ dodaje se nova rečenica koja glasi: „Svoj Poslovnik o radu kao i njegove izmjene usvajaju Upravni odbor u skladu sa stavom 3. člana 42. ovog Statuta.“*

#### **Članak 15.**

*U Članku 45., stav 2., nakon riječi „odbora“ stavlja se zarez nakon kojeg se dodaju nove riječi: „u skladu sa članom 11., članom 41. alinejom 12., kao i članom 42. stav 3. ovog Statuta, kao i u skladu sa članom 8. stavom 1. Zakona o JRT servisu BiH.“*

*U Članku 45., stav 3., nakon riječi „radu“ dodaju se nove riječi: „Programskog vijeća kojeg usvajaju njegovi članovi i daju na saglasnost“, a riječi „Upravnog odbora“ brišu se i zamjenjuju riječima „Upravnom odboru“*

*U Članku 45., dodaje se novi stav 4., koji glasi: „Programsko vijeće ima 9 članova.“*

#### **Članak 16.**

*U Članku 48., u stavu 1. nakon riječi „BHRT-a“ dodaju se nove riječi: „u skladu sa Zakonom o JRT servisu BiH i ovim Statutom.“*

#### **Članak 17.**

*U članu 49., u stavu 2. nakon riječi „rada“ dodaje se nova rečenica koja glasi: „Prilikom intervjua svaki kandidat dužan je odgovoriti na sva pitanja postavljena od članova Upravnog odbora.“*

#### **Članak 18.**

*U Članku 50. stavu 2. nakon alineje 20) dodaju se nove alineje 21), 22), 23), 24) i 25) koje glase:*

**„- na svakoj sjednici Upravnog odbora izvještava o provedbi odluka Poslovnog odbora i odluka**

**Upravnog odbora;**

**- sprovodi odluke/zaključke Upravnog odbora**

**- odgovoran je za zakonitost rada BHRT (glavnih ravnatelja, šefova sektora, glavnih urednika, kao**

**i svih zaposlenika BHRT...);**

**- odgovoran je za pokretanje i provođenje disciplinskih postupaka u slučaju nezakonitosti rada**

**bilo kojeg zaposlenika u BHRT;**

**- odgovoran je za pokretanje postupaka utvrđivanja zakonske odgovornosti bilo koje pravne i/ili**

**fizičke osobe u slučaju njihovog nezakonitog rada kojima je nanesena šteta interesima BHRT;“**

*U Članku 50. dosadašnja alineja 21) postaje alineja 26).*

## Članak 19.

*U Članku 56. u Stavu 1. nakon alineje 2) dodaju se nove alineje 3) i 4) koje glase:*

**„- ukoliko ne sprovodi odluke/zaključke Upravnog odbora;  
- ukoliko ne sprovodi obaveze glavnog ravnatelja iz članova 50. i 51. ovog Statuta.“**

## Članak 20.

*U Članku 58. nakon Stava 1. dodaje se novi Stav 2. koji glasi:*

**„Za ravnatelje BHR1 i BHT1, kao i za v.d. ravnatelje BHR1 i BHT1, procedura imenovanja sprovodit će se u skladu sa članom 11., članom 41. alinejom 12., kao i članom 42. stav 3. ovog Statuta, kao i u skladu sa članom 8. stavom 1. Zakona o JRT servisu BiH. Za svako imenovanje ravnatelja BHR1 i BHT1, kao i za v.d. ravnatelja BHR1 i BHT1, glavni ravnatelj predlaže Upravnom odboru najmanje tri (3) kandidata.“**

*U Članku 58. dosadašnji Stav 2. postaje Stav 3.*

## Članak 21.

*U Članku 59. nakon Stava 4. dodaje se novi Stav 5. koji glasi:*

**„Za imenovanje rukovoditelja Odjela Glazbene produkcije BHRT, kao i za imenovanje v.d. rukovoditelja Odjela Glazbene produkcije BHRT, procedura imenovanja sprovodit će se u skladu sa članom 11., članom 41. alinejom 12., kao i članom 42. stav 3. ovog Statuta, kao i u skladu sa članom 8. stavom 1. Zakona o JRT servisu BiH. Za svako imenovanje rukovoditelja Odjela Glazbene produkcije BHRT, kao i za imenovanje v.d. rukovoditelja Odjela Glazbene produkcije BHRT, glavni ravnatelj predlaže Upravnom odboru najmanje tri (3) kandidata.,,**

## Članak 22.

*U Članku 60. nakon Stava 2. dodaju se novi stavovi 3., 4., 5. i 6. koji glase:*

**„Za imenovanja urednika programa glavni ravnatelj predlaže Upravnom odboru najmanje tri kandidata, u skladu sa članom 8. (Zastupljenost prema Ustavu BiH) Zakona o javnom radiotelevizijskom servisu Bosne i Hercegovine. Upravni odbor daje prethodnu suglasnost za svako imenovanja urednika programa.**

**U okviru jednog programskog sektora (BHT1 i BHR 1) ravnatelj i urednik informativnog programa ne mogu pripadati istom konstitutivnom narodu. U pogledu imenovanja ostalih urednika programa potrebno je poštovati nacionalnu zastupljenost u skladu sa članom 8. stavom 1. Zakona o JRT servisu BiH.**

**Prilikom razješenja urednika programa na BHT1 ili BHR1, Glavni ravnatelj BHRT i ravnatelji sektora - BHT1 i/ili BHR1 treba da postignu suglasnost. U slučaju njihovog neslaganja konačnu odluku o razrješenju urednika programa na BHT1 ili BHR1 donosi Upravni odbor na zahtjev Glavnog ravnatelja, ili ravnatelja BHT1, ili BHR1.**

**Svaki urednik programa, kao i v.d. urednika programa, bira se u skladu sa članom 11., alinejom 12. člana 41., i članom 42. stav 3. ovog Statuta, kao i u skladu sa članom 8. stavom 1. Zakona o JRT servisu BiH. Za svako imenovanje urednika programa i /ili v.d. urednika programa glavni ravnatelj predlaže Upravnom odboru najmanje dva (2) kandidata, uz prethodnu postignutu saglasnost sa ravnateljem sektora.“**

#### **Članak 23.**

*U Članku 64. u stavu 2. nakon riječi „ploča“ dodaju se nove riječi: „WEB-strana BHRT,“.*

#### **Članak 24.**

*U Članku 72. nakon alineje 13) dodaju se nove alineje 14), 15) i 16) koje glase:*

**„- Poslovnik o radu Poslovnog odbora BHRT;  
- Poslovnik o radu kolegija,  
- Pravilnik o radu Ravnateljstva/Direkcije generalnog direktora BHRT, i“**

*U Članku 72. dosadašnja alineja 14) postaje alineja 17) i mijenja se na način da se nakon riječi „Zakonom“ dodaju nove riječi: „i na osnovu odluke Upravnog odbora.“*

#### **Članak 25.**

*U Članku 73. nakon stava 2. dodaje se novi stav 3. koji glasi: „Opći akti BHRT objavljuju se na službenoj WEB strani BHRT.“*

#### **Članak 26.**

*U Članku 74. nakon riječi „Statut“ stavlja se zarez nakon kojeg se dodaju nove riječi: „kao i njegova svaka izmjena i dopuna,“, a nakon riječi „BHRT-a“ dodaju se nove riječi: „ kao i na WEB-strani BHRT.“*

*U Članku 74. nakon stava 1. dodaje se novi stav 2. koji glasi:*

**„Objavljivanje na oglasnoj ploči u sjedištu BHRT i na WEB-strani BHRT bit će izvršeno istog dana. Prečišćen tekst Statuta BHRT objavljuje se na isti način nakon usvajanja svake izmjene i dopune Statuta BHRT. Upravni odbor BHRT donosi posebnu odluku o datumu objavljivanja i Izmjena i dopuna Statuta BHRT, kao i Prečišćenog teksta Statuta BHRT.“**

#### **Članak 27.**

*U Članku 75. nakon stava 2. dodaju se novi stavovi 3., 4. i 5. koji glase:*

**„Sve izmjene i dopune ovog Statuta bit će objavljene u «Službenom glasniku BiH».**

**Sve izmjene i dopune ovog Statuta bit će objavljene i na WEB-strani BHRT.**

**Prečišćen tekst Statuta BHRT objavljuje se na oglasnoj ploči u sjedištu BHRT, WEB-strani BHRT i „Službenom glasniku BiH“.**

## **Članak 28.**

*Nakon Članka 77. dodaju se novi članci 78. i 79. koji glase:*

### **„Članak 78.**

**Sve operativne, savjetodavne i ostale poslove Upravnog odbora BHRT vodit će Tajništvo Upravnog odbora BHRT, kao i poslove koordiniranja između Upravnog odbora i Poslovnog odbora.**

**Tajništvo Upravnog odbora BHRT odgovorno je za svoj cjelokupan rad Upravnom odboru BHRT.**

**Nadležnosti Tajništva Upravnog odbora BHRT definirane se na osnovu Zakona o JRT servisu BiH, Zakona o JRT sistemu i ovog Statuta.**

**Tajništvo Upravnog odbora BHRT čine:**

- Glavni tajnik UO BHRT koji obavlja poslove koordinacije i saradnje između javnih servisa, koordinacije sa generalnim direktorima javnih servisa i koordinatorom za uspostavu Korporacije, te rukovodi uposlenicima Tajništva Upravnog odbora BHRT;
- Savjetnik za pravna pitanja i saradnju sa nadležnim vlastima i međunarodnim organizacijama;
- Savjetnik za ekonomska pitanja;
- Stručni suradnik za rad upravnih tijela;
- Interni revizor;
- kao i povremeno angažirani savjetnici za druga pitanja o čijem angažmanu odlučuje Upravni odbor BHRT.

**Upravni odbor BHRT bira i imenuje Generalnog tajnika Upravnog odbora BHRT, stručnog saradnika za rad upravnih tijela, kao i sve ostale odgovorne osobe pobrojane u prethodnom stavu.**

**BHRT zasniva radni odnos sa svim članovima Tajništva Upravnog odbora BHRT koja je obavezna da finansira rad Tajništva Upravnog odbora BHRT. U pravilu, članove Tajništva Upravnog odbora BHRT Upravni odbor BHRT imenuje iz reda uposlenika BHRT. Ova pitanja preciznije će biti definirana Poslovníkom o radu Tajništva Upravnog odbora BHRT.**

**Obaveza je Poslovnog odbora BHRT da nakon usvajanja Poslovníka o radu Tajništva Upravnog odbora BHRT u roku od 30 dana uskladiti sa ostalim općim aktima BHRT, posebno Pravilnikom o sistematizaciji BHRT.**

**Poslovník o radu Tajništva Upravnog odbora BHRT predlaže Upravnom odboru BHRT na usvajanje predsjedavajući Upravnog odbora BHRT zajedno sa Generalnim tajnikom Upravnog odbora BHRT, u roku od 30 dana nakon usvajanja izmjena ovog Statuta.**

### **Članak 79.**

**Do osnivanja Korporacije, Tajništvo Upravnog odbora BHRT vodit će sve operativne, savjetodavne i ostale poslove za Odbor JRTS Bosne i Hercegovine (Odbor sistema) u skladu sa Zakonom o javnom RTV sistemu BiH („Službeni glasnik BiH“, brojevi: 78/05**

i 35/09), odlukama drugih državnih organa koje se odnose na Odbor sistema, dosadašnjim zaključcima Odbora sistema, kao i dosada uspostavljenom dobrom praksom između tri javna servisa (BHRT, RTVFBiH i RTRS).

Poslovima koji se odnose na uspostavu Korporacije sve do okončanja procedure izbora njenog direktora, rukovodi Koordinator za uspostavu Korporacije (Koordinator) kojeg u skladu sa zakonskom procedurom bira i imenuje Odbor sistema.

Predsjedavajući Odbora sistema zajedno sa Koordinatorom predlažu Odboru sistema na usvajanje Pravilnik o poslovima i zadacima Koodinatora. (Pravilnik). Odbor sistema daje suglasnost na ovaj Pravilnik.

Za pitanja koja se odnose na uspostavu Korporacije, ili koja su od zajedničkog interesa sva tri javna servisa – tijela drugih javnih servisa (RTVFBiH i RTRS) mogu Upravnom odboru BHRT predložiti za izbor i imenovanje posebno mjesto savjetnika u Tajništvu Upravnog odbora BHRT.

Do uspostve Korporcije u Tajništvo Upravnog odbora BHRT mogu da budu predlagani za imenovanja i uposlenici iz druga dva javna servisa (RTVFBiH i RTRS). Javni servisi (RTVFBiH i RTRS) mogu da učestvuju u participiranju dijela plaća i doprinosa za rad pojedinih članova Tajništva Upravnog odbora BHRT u skladu sa odlukom Odbora sistema.

Odbor sistema, ili drugi javni servisi, mogu Upravnom odboru BHRT predložiti osobu za imenovanje Generalnog tajnika Upravnog odbora BHRT.“

#### Članak 29.

Ove izmjene i dopune Statuta stupaju na snagu danom objavljivanja na oglasnoj ploči BHRT i na WEB stranici BHRT, uz istovremeno objavljivanje Prečišćenog teksta Statuta BHRT sa izvršenim izmjenama i dopunama.

*Predsjedatelj Upravnog odbora BHRT*

Ahmed Žilić